



BEINVEGNI

Plaunsiu mein nus tuts ella stagiun dalla pausa beinmeritada. Quella havein nus segramein meritau suenter quei unviern extraordinari e tuttina pleins cun occurrenz. La stagiun morta ei adina enzatgei special, cu la davosa neiv carmala da guder las pistas, il medem temps che la primavera arriva giu la Bassa. Quei temps semuossan biaras factetas da nossa biala vischnaunca puspei expressivamein. Nus havein gl'avantatg e savein profitar d'omisus ed eleger denter ils delets da primavera ed il divertiment sin pista. Per la vischnaunca ei la primavera cumbinada cull'entschatta dils projects da baghegiar. Ei vala da prender ora pic e pala e maschinas, cu neiv e glatsch dattan adia. Lein pia selegrar dils segns da primavera, dad entgins gis libers sur Pastgas e che nos projects gartegen.

Franz Gschwend
President communal



Quest Link meina Vus tier las Novas da Laax en tudestg e romontsch

IMPRESSUM:

Novas da Laax, Vischnaunca da Laax
Cumpara: mintg'uter meins, alla fin dil meins
Proxima ediziu: 26 da matg 2023
Ideas per tematicas: tochen ils 10 da matg 2023
Redacziun: Domenica Flütsch
Contact: admin@laax-gr.ch



LAG GROND LEIN TUTS HAVER QUITAU

In'expertisa fatga avon dus onns ha mus-sau che nies Lag Grond ei sauns e buca malsauns. Las examinaziuns dil biro ecowert GmbH dattan in bien attestat alla lavur ed als sforzs che la vischnaunca fa pil lag. Finamira eis ei naturalmeins che nossa «pèdra preziusa» resti aunc gitg sauna e ch'il lag sappi ademplir sia funcziun sco spazi da viver per plontas ed animals, sco lag da far bogn, e la riva per ir a spass e liug da s'entupar. Per ch'ins sappi metter tut quellas pretensiuns sut in tetg drova il Lag Grond il sustegn da tuts, indigens e hospis. Il reglament approbaus il 2019 gida che la populaziun sa guder ina buna convivenza ella ed all'aua.

Scamond da carrar entuorn il lag

Specialmeins rendein nus attent al scamond general da carrar silla senda entuorn il lag. Quel pertucca buca mo vehichels a motor da tut gener mobein era velos. Tuts vehichels (autos, mopeds e velos) ein da parar sils plazs defini e buca vid seivs ni baghetgs.

Obligaziun da prender en corda ils tgauns

A possessurs da tgauns rendein nus attent ch'els ston prender en corda lur animals, sigl entir areal dil Lag Grond ei quei obligatoric. Durent la stagiun da far bogn eis ei scumandau naven dallas 8.00 tochen las 20.00 da schar senudar tgauns el lag. Sil pastget da star a suleagl astgan ins ir cun tgauns mo per liung gl'Ual Fraissen.

Negin paun per andas

Adina puspei vegnan las andas perveidas cun grondas quantitads da paun vegl. Quei ei buca mo nuscheivel pils utschals e lur digestium, mobein promovava fetg che las andas vegnan attaccadas dils pèlischs. Schi prest che las temperaturas sesaulzan, semultiplichescha era la populaziun da larvas da quels animals ch'ei mulestus denton buca prigus per nus carstgauns. Cun desister da pavlar paun allas andas san tuts gidar da tener a mistregn quella mulesta dalla stad.

SANAZIUN DA VIAS 2023

Via Murschetg

Ils 11 d'avrel 2023 entscheivan las lavurs da sanaziun dalla Via Murschetg. Sil tschan-cun dalla fermada dils bus a Laax Pendicularas vegn il traffic sviaus.

Via Grava / Via Fraissen e dislocaziun digl Ual Fraissen

Medemameins ils 11 d'avrel 2023 entscheivan las lavurs da sanar las vias Grava e Fraissen sco era quellas da dislocar il letg digl Ual Fraissen. Quellas lavurs cuozzan tochen la fin da november 2023.

Via Pattadiras / Via Davos Baselgia

Suenter Pastgas decideiva era la sanaziun dallas vias Pattadiras e Davos Baselgia.

Gl'access cun vehichels a tuttas parcelas dallas duas vias ei serraus. Gl'access a pei ei garantius. Pusseivladads da parcar dat ei sil parcadi provisoric ch'ei installaus.

Informaziuns detagliadas dallas lavurs da construcziun, dils impediments da traffic ni autras lavurs e comunicaziuns vegnan comunicadas ed actualisadas cuntinuadameins ella pagina d'internet dalla vischnaunca.



A caschun dalla proxima radunonza da vischanunca damonda la fundaziun Pro Laax in credit per renovar il fuorn da paun a Furnatsch.

RENOVAZIUN DIL FUORN DA PAUN A FURNATSCH

Erwin Ardüser, president Pro Laax

Ozildi secapescha ei da sez ch'ins ha quasi mintga di paun frestg sin meisa. Avon onns, cura ch'ei deva a Laax aunc negin pasterner, ni pec sco nus schein era, vegneva il paun fatgs el pistregn, e quei capitava buca mintga di. Era en nossa vischnaunca deva ei in entir triep fuorns communals e pistregns. En quels vegneva era fatg lischiva, e savens lu il medem mument era paun, barbaladas, leventadas e biscutins. E co ins sa leger el «Cudisch da Laax» fageva il muliner mintga jamna era in fuorn paun per ils paupers.

La tradiziun viva

Avon varga 40 onns ei la tradiziun dil far paun el fuorn da lenn vegnida reactivada a Laax. Pusseivel ei quei stau grazia al fatg ch'il fuorn dalla famiglia Gliott a Furnatsch ei vegnius renovaus igl onn 1982. Dapi lu

vegn puspei fatg regularmein paun en quei fuorn ch'ei vegnius construius l'entschatta dils onns 1800. Quei per diever privat e per fiastas ed occurrenzas – sco per exempel per la fiera dil vitg.

Suenter ch'ins ha ils davos onns adina puspei fatg lavurs da manteniment pli pintgas, eis ei ussa necessari da renovar da rudien il baghetg. La fundaziun Pro Laax, che s'engascha era pil manteniment dallas tradiziuns e per la fatscha dil vitg, e che ha priu a tscheins il fuorn dapi 1982, ha decidiu da suttammer alla radunonza da vischnaunca dils 15 d'avrel la damonda per in credit da rodund 90'000.- frs. per exequir las lavurs necessarias. Accepta il suveran la proposta, eis ei garantiu ch'era las proximas generaziuns san far diever dallas localitads e guder il bien paun ord il fuorn da lenn da Furnatsch.

RENOVATION BACKHAUS

Seit mehr als 40 Jahren ist das Backhaus «Furnatsch» in Laax wieder in Betrieb. Regelmässig wird dort für den Privatgebrauch, aber auch für Veranstaltungen – wie zum Beispiel den jährlichen Dorfmarkt – Brot gebacken.

Damit das Gebäude auch den nächsten Generationen zur Verfügung steht, ist eine Renovation notwendig. Den dafür nötigen Kredit beantragt die Stiftung Pro Laax an der Gemeindeversammlung vom 15. April.

CALENDER

Sonda, 1. d'avrel 2023

Aertura exposiziun ambulonta «Rumantsch è»

13.00 – 17.00 Uhr

L'exposiziun ambulonta ella Cularta muossa la multifariadad dil lungatg e dalla cultura romantscha. Andreas Gabriel, secretari general a.i. dalla LR, meina tras l'exposiziun. Presentaziun: allas 14.00.

Uras d'avertura

2 d'avrel – 14 da matg 2023
gi / ve / so / du 13.30 – 16.30

Sonda, 8 d'avrel 2023

«Laufend Romanisch lernen»

17.00 – 18.30

Emprender romantsch duront ina girada cumadeivla tras il vitg e scuvierer las attraziuns da Laax. Liug da s'entupar: Cularta. Annunzias tochen las 12.00:
info@museumlaax.ch

Vendergis, 14 d'avrel 2023

Café nocturn el Museum Laax

18.00 – 24.00

Las localitads historicas dil Museum da Laax envidan ad in sitg da bunanotg cumadeivel, cun discuers e da cumpignia cun glied da Laax e d'utro.

Sonda, ils 15 d'avrel 2023

Buorsa da resti ed artechels d'affons

09.30 – 13.30

L'Uniun da dunnas da Laax envida alla buorsa da resti ed artechels d'affons. Annunzias ed ulteriuras informaziuns:
www.dunnas-laax.ch/buorsa/

Sonda, ils 15 d'avrel 2023

Radunonza communal

silsuenter apéro e tscheina
Aula Grava, 16.00.

Sonda, ils 22 d'avrel 2023

Concert Mattiu

20.00

Concert dil cantautur indigen Mattiu Defuns. Bigliets: www.mattiu.ch
Aula casa da scola Laax

Sonda, ils 29 d'avrel 2023

«Rumantsch è» cun Anna Rita Stoffel – Donat Caduff

17.00

La curatura Anna Rita Stoffel e gl'artist Donat Caduff meinan tras l'exposiziun. Silsuenter dat ei in apéro. S'annunziar: info@cularta.ch